

ԲԱԶՄՄԱՎԱՍՏԱԿ ԳԻՏՆԱԿԱՆՔ ԵՎ ՄԱՆԿԱՎԱՐԺՐ

(Վաճառ Ռշտունու ծննդյան 100-ամյակի առթիվ)

Այս տարի բոլորեց ականավոր պատմաբան, ՀՀ գիտությունների ազգային ակադեմիայի թղթակից անդամ, պատմական գիտությունների դոկտոր, պրոֆեսոր, հանրապետության գիտության վաստակավոր գործիչ Վահան Հատունի Ռշտունու ծննդյան 100-ամյակը:

Չնայած մեր այսօրվա կյանքի բոլոր վայրիվերումներին, անցյալի շատ արժեքների ու դեմքերի հանիրավի մոռացության տալու դատապարտելի միտումներին, մեր սրբազան պարտքն է պատշաճը մատուցել նախորդ սերունդների այն արժանավոր ներկայացուցիչներին, որոնք ազնվորեն ու անմընացորդ ծառայել են հարազատ ժողովրդին:



Պրոֆեսոր Վ. Ռշտունին պատկանում է այն բացառիկ մանկավարժ-գիտնականների թվին, որոնք ոչ միայն սովորական գիտելիքներ են հաղորդում իրենց սաներին ու ընթերցողներին, այլև անջնջելի հետք են թողնում նրանց սրտերում:

Վահան Ռշտունին ծնվել է 1894 թ. փետրվարի 6-ին Վաղարշապատ քաղաքում, Արևմտյան Հայաստանի Ռըշտունիք գավառից գաղթած պանդուխտ-արհեստավորի ընտանիքում: Նախնական կրթությունն ստանալով րնտանիքում, ուսումնատենչ պատահին այնուհետև ընդունվում է էջմիածնի Գևորգյան ճեմարանը, որն առկա էր Մանուկ Աբեղյանին, Հակոբ Մանանդյանին, Հրաչյա Աճառյանին և ուրիշ անվան ռասախոսների ու գիտնականների: 1915 թ. ավարտելով ճեմարանը, Վ. Ռշտունին ուսուցչական աշխատանք է կատարում Թավրիզում, Ախալցխայում, Սուխումում և Թիֆլիսում:

1919 թ. Վ. Ռշտունին ընդունվում է Թիֆլիսի պոլիտեխնիկական ինստիտուտի հասարակագիտական ֆակուլտետը, որն ավարտում է 1924 թ.: Այնուհետև նա տեղափոխվում է Երևան և դասախոսական աշխատանքի անցնում պետական համալսարանում, իր կյանքի վերջին հինգ տասնամյակը նվիրաբերելով պատմաբանների բազմաթիվ սերունդների կրթության ու դաստիարակության գործին: 1925 թ. նա համալսարանում կարդացել է սոցիալիզմի պատմություն, իսկ 1931 թ. ԽՍՀՄ ժողովուրդների պատմության դասընթաց՝ դառնալով համալսարանում այդ ամբիոնի հիմնադիրն ու անփոփոխ ղեկավարը մինչև իր կյանքի վերջը՝ 1970 թ.: Պրոֆ. Վ. Ռշտունին այն հմուտ դասախոսներից էր, ովքեր ոչ միայն դիտելիքներ են տալիս, այլև իսկապես կրթում ու դաստիարակում իրենց սաներին: Կուլեգաներն ու սաները մի առանձին ակնածանքով են հիշում նրա հոգատարությունը, բարությունն ու մարդ-

կային այլ առաքինությունները: Համալսարանում աշխատած տարիներին պրոֆ. Ռշտունին եղել է նաև պատմության ֆակուլտետի դեկան, ուսումնական մասի վարիչ (պրոռեկտոր), դիտական աշխատանքների սեկցիայի դեկավար, գործուն մասնակցություն է ունեցել նաև հանրապետության հասարակական-քաղաքական կյանքին, երկու անգամ ընտրվել է Երևանի քաղաքային խորհրդի պատգամավոր, բարեխղճորեն կատարել իր պարտականությունները:

Պրոֆ. Վ. Ռշտունին ոչ միայն հմուտ մանկավարժ էր, այլև խորաթափանց գիտնական, բեղմնավոր հետադոտոր, 1938—1952 թթ. նա համատեղության կարգով աշխատել է սկզբում ԽՍՀՄ գիտությունների ակադեմիայի հայկական մասնաճյուղում (ԱրմՖԱՆ), ապա՝ Հայաստանի գիտությունների ակադեմիայի պատմության ինստիտուտում: 1940 թ. «Հայ հասարակական-քաղաքական հոսանքները և 1861—1865—1870 թթ. գյուղացիական ռեֆորմը» թեմայով նա պաշտպանել է թեկնածուական, իսկ մեկ տարի անց՝ «Գյուղացիական ռեֆորմը Հայաստանում 1870 թ.» դոկտորական դիսերտացիա: 1943 թ. Վ. Ռշտունուն շնորհվել է պրոֆեսորի, իսկ 1946 թ.՝ գիտության վաստակավոր գործչի կոչումներ: 1956 թ. Վ. Ռշտունին ընտրվել է Հայաստանի գիտությունների ակադեմիայի թղթակից անդամ, արժանացել պետական մի շարք պարգևների:

Պրոֆ. Ռշտունին, լինելով մեծ էրուդիցիայի ու անալիտիկ մտքի տեր գիտնական, կուռ տրամաբանությամբ օժտված պատմաբան, կարևոր ավանդ է ներդրել հայոց նոր և նորագույն պատմության հետազոտության բնագավառում: Առանձնապես ուշագրավ են Արևելյան Հայաստանի XIX—XX դդ. պատմության սոցիալ-տնտեսական կյանքի բազմաթիվ հիմնահարցերին նվիրված նրա մի շարք հետազոտությունները: Հայ պատմագիտության մեջ նա առաջինը ուսումնասիրեց 1870 թ. Հայաստանում իրագործված գյուղացիական ռեֆորմը, հողային հարաբերությունները և գյուղացիական շարժումները, դրանց վերաբերյալ հրատարակելով նաև արխիվային արժեքավոր փաստաթղթեր: Գիտական մեծ հետաքրքրություն է ներկայացնում հատկապես պրոֆ. Ռշտունու «Գյուղացիական ռեֆորմը Հայաստանում» մենագրությունը, որտեղ հեղինակը մանրամասնորեն քննարկում և լուսաբանում է ռեֆորմի սոցիալ-տնտեսական նախադրյալները, նրա առանձնահատկությունները, գյուղացիների իրավական և տնտեսական վիճակը, հողի փերկազմման պայմանները, Հայաստանում կապիտալիզմի զարգացման յուրահատկությունները, հասարակական հոսանքների դիրքը և այլ հարցեր: Պրոֆ. Ռշտունու գիտական ժառանգության առաջնակարգ նշանակությունն այն է, որ նա, առաջինը բարձրացնելով վերը նշված հարցերը, հիմնավորեց որոշակի ուղղություն, հիմք դրեց մի դպրոցի, որին հետագայում հետևեցին շատերը: Գյուղացիության պատմության և սոցիալ-տնտեսական խնդիրների հետ առնչվող շատ հարցեր հետագայում ավելի մանրազնին ուսումնասիրվել և լուսաբանվել են պրոֆ. Ռշտունու աշակերտների կողմից թե՛ պատմագիտության և թե՛ տնտեսագիտության բնագավառներում, ելակետ ունենալով նրա առաջադրած սկզբունքներն ու տեսակետները:

1950-ական թթ. վերջերին պրոֆ. Վ. Ռշտունին ձեռնարկեց «Ուրվագծեր Հայաստանի գյուղացիության պատմության (1828—1917 թթ.)» երեք մասից բաղկացած աշխատության շարադրումը: Առաջին մասն ընդգրկում է արևելահայ գյուղացիության պատմությունը 1828—1870 թթ., երկրորդը՝ ռեֆորմի և ետռեֆորմյան շրջանը: Վերահաս մահը խանգարեց երրորդ մասի հրատարակությանը: Գիտնականի այդ մենագրությունը ագրարային գյուղացիական հարցի վերաբերյալ երկար տարիների ընթացքում նրա կատարած ուսումնասիրությունների հանրագումարն է և կարևոր ներդրում հայ պատմագիտության մեջ: 1956 թ. պրոֆ. Ռշտունին հրատարակեց «Հայ հասարակական հոսանքների պատմությունից» սովորածավալ ժողովածուն, որը ամ-

փոփոխված են գիտական պարբերականներում տարբեր ժամանակներում լույս ընծայված նրա մի շարք հոդվածները:

Պրոֆ. Ռշտունին զբաղվել է նաև Անդրկովկասի պատմությամբ, լուսաբանել է ցարիզմի գաղութային քաղաքականությունը պատմական տարբեր փուլերում, երկրամասում կապիտալիզմի զարգացման գործընթացը և այլ խնդիրներ: Պրոֆ. Ռշտունին գործուն մասնակցություն է ունեցել հայ ժողովրդի պատմության դպրոցական դասագրքերի և ՀԳԱ պատմության ինստիտուտի կողմից հրատարակված հայոց պատմության բազմահատորյակի ստեղծմանը:

Մեծանուն գիտնականը իր եզրակացությունները կատարում էր փաստերի ու երևույթների բազմակողմանի համադրմամբ ու վերլուծությամբ, բարեխիղճ ուսումնասիրությամբ և բնավ պատահական չէր, որ 1950-ական թթ. սկզբներին, երբ վերադաս կուսակցական մարմինների թելադրանքով մի շարք պատմաբաններ ու բանասերներ մեղադրվեցին «բուրժուական», այսպես կոչված «միասնական հոսանքին» պաականելու մեջ, Ռշտունին համարձակորեն պաշտպանեց իր գիտական սկզբունքները:

Պրոֆ. Վահան Ռշտունու կյանքն ու գործունեությունը սերտորեն կապված են Երևանի պետական համալսարանի և Հայաստանում պատմական գիտության զարգացման հետ: Երախտապարտ սերունդները ընդմիջտ վառ են պահում նրա պայծառ հիշատակը:

Պատմ. գիտ. դոկտոր Հ. Ու. ՄելիքՍԵՅԱՆ